

Ketum hampir RM1 juta dirampas

2 Oktober 2019

PGA tahan tujuh PATI warga Myanmar dalam operasi sejak Ogos lalu

# Ketum hampir RM1 juta dirampas

Oleh NORLIDA AKMAR IDROS

**BUKIT KAYU HITAM** - Pasukan Gerakan Am (PGA) Batalion 1 Ulu Kinta, Perak berjaya mematahkan cubaan menyeludup sebanyak 6,335 kilogram (kg) daun ketum bernilai RM950,250 melalui sempadan Malaysia-Thailand di Kedah dan Perlis sejak Ogos lalu.



MOHAMED RAFIQ

Kejayaan itu adalah hasil penugasan dalam Ops Wawasan Kedah/Per-

lis yang bermula pada 27 Ogos lalu hingga semalam.

Timbalan Komander Briged Utara, Asisten Komisioner Mohamed Rafiq Mohamed Mustafa berkata, kegiatan penyeludupan yang didalangi sindiket itu dikesan masih berlaku di laluan-laluan haram di sepanjang sempadan terutama Padang Besar, Perlis.

"Ini berlaku disebabkan permintaan tinggi terhadap daun ketum di Thailand," katanya pada sidang



PGA Batalion 1 Ulu Kinta, Perak berjaya merampas sebanyak 6,335kg daun ketum sejak Ogos lalu. - Gambar hiasan

akhbar di Markas Taktikal Bukit Kayu Hitam di sini

semalam.

Menurutnya, modus

operasi sindiket adalah meletakkan bekalan daun ketum di satu lokasi di kawasan hutan berhampiran sempadan sebelum pihak lain disyaki dari negara jiran menyeludup tumbuhan itu ke Thailand.

"Kebiasaannya, kerja-kerja (penyeludupan) ini dilakukan pada waktu malam oleh penduduk yang mahir dengan bentuk muka bumi kawasan tersebut.

"Mereka akan meletakkan daun ketum di satu lokasi sebelum pihak lain mengambil bekalan itu untuk diseludup ke negara jiran," jelasnya.

Ujar Mohamed Rafiq, hasil operasi yang dilakukan, sindiket terbabit disyaki menggunakan taktik lain iaitu menyeludup daun ketum menggunakan kenderaan seperti lori di laluan sah.

Sementara itu, dalam operasi sama, ujarinya, pihak PGA berjaya menahan seramai tujuh pendatang asing tanpa izin (PATI) warga Myanmar berusia antara dua hingga 45 tahun.

Menurutnya, jumlah rampasan melibatkan daun ketum serta tujuh buah kenderaan dianggarkan bernilai RM1.02 juta.